



CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

23

T 3194/4634.85



吉安府志卷四十

哈佛大學漢和圖書館珍藏印

人物志

大臣 三

明

蕭 暄 張敷華附孫 陳 儼附子 劉 言 彭 華

尹 直 龍 文 彭 禮 歐陽旦附弟 劉 丙

王懋中 伍 符 李 貢 周孟中 劉 孟

趙 璜 羅欽順 劉 命玉 李 中附 歐陽鐸

歐陽重 王學夔 周 煦 歐陽必進 王學益

郭宗臯 周 寀 聶 豹 毛伯溫 歐陽德附瑜

周 延 羅欽忠 楊載鳴 張 雨 宋儀望

朱衡 尹臺 曾同亨附第蕭廩 張綱

彭黠 歐陽塾 劉愨 王士翹 曾于拱

郭子章 鄒元標 劉日升 鄒德泳 謝應翔

曠鳴鸞 朱世守 蕭命官 蕭近高 王振奇

康新民 劉士正 李日宣 李邦華 龍之虬

劉同升 郭維經

國朝

李元鼎 李振裕

明

蕭暄字仰善泰和人宣德間進士嘗為雲南布政使會海邊警奉敕勦之暄為宣布德意執其首惡餘黨悉縱不

問有千戶以鬪傷起獄蔓引百餘人連歲不決暄一訊

得其情雲南遠藩供需率踰制暄盡為裁省擢湖廣左

布政使時工部造漕船歲為民累暄謂官積木累萬而

重賦於民非便言之部民得緩役官至禮部尚書萬曆府志

張敷華字公實安福人父洪御史死土木難敷華少負氣

節年七歲里社樹為崇麾羣兒盡伐之景泰初錄死事

後入國學舉天順八年進士選庶吉士成化元年與劉

大夏願就部曹除兵部主事歷郎中廉重不撓名等於

大夏十一年出為浙江叅議景寧礦盜起至數千人敷

華諭散之執其魁十二人居浙十餘年歷布政使宏治

初遷湖廣歲饑令府縣大修學宮以傭直資餓者擢右

副都御史巡撫山西中道奔喪服闋還故官部內賦輸大同困於折價敷華請太原以北可通車者仍輸米民便之改撫陝西製婚娶喪葬之式納民於禮妖僧據終南山為逆廷議用兵尚書馮文升曰張都御史能辦此敷華果以計縛僧歸遷南京兵部右侍郎十二年改右都御史總督漕運兼巡撫淮揚諸府高郵湖隄圯浚深溝以殺水勢又築寶應隄民利賴焉改掌南京都察院與吏部尚書林瀚僉都御史林俊祭酒章懋稱南都四君子就遷刑部尚書正德元年召為左都御史其冬大臣與言官請去劉瑾等內閣力主之帝猶豫敷華乃上言陛下宴樂逸遊日狎儉壬政令與詔旨相背行事與

成憲交乖致天變上千人心下拂今給事中劉蒞御史朱廷聲徐鉉等連章論列但付所司英國公懋與臣等列名上請但云朕自處置臣竊嘆惑請畧言時政之弊如四十萬庫藏已竭而取用不已六七歲童子何知而招為勇士織造已停傳奉已革尋復如故鹽法莊田方遣官清覈而奏乞之疏隨聞中官監督京營鎮守四方者一時屢有更易政令紛拏弊端滋蔓夫國家大事百人爭之不足數人壞之有餘願陛下審察疏入不報既而朝事大變宦官勢益張至除夕朝罷忽傳旨與楊守隨俱致仕敷華即日就道至徐州洪坐小艇觸石幾溺死瑾恨未已欲借湖廣倉儲浥爛坐以贓罪修撰康海

過瑾曰吾秦人愛張公如父母公忍相薄耶瑾意稍解
猶坐敷華奸黨與守隨等榜名朝堂明年六月病且革
衣冠揖家廟就榻而卒瑾誅後二年贈太子少保諡簡
肅敷華性剛介宏治時劉大夏常薦之帝曰敷華誠佳
但為人太峻耳為部郎奉使盜探其囊得七金而已孫
鰲山官御史

明史

陳儼字時莊廬陵人景泰進士累官貴州巡撫與利剔弊
惟恐不及西堡寨苗弗馴往諭之歸化者半有終弗率
者請於上躬擐甲胄搥其巢號令嚴明信賞必罰於是
憑崖伏洞者望風請降或持牛酒詣軍門羅拜捷聞賜
勅褒嘉仲子景從軍有功弗報將佐請奏捷亦不聽官

至南刑部侍郎

通志本貴州名宦志

劉宣字紹和安福人父戍役於盧龍蚤世宣代往因為衛
學生在行伍中不廢學景泰庚午舉順天鄉試第一明
年成進士選庶吉士授編修為經筵講官英廟實錄成
陞右庶子進南太常少卿掌國子監祭酒由吏部侍郎
陞南工部尚書宣重厚優容喜愠不見於色居太常十
一年絕觖望為南司成待諸生誠意譎然教有條式因
其才而勉進之琉球諸國遣子弟求就學人曰行故事
爾奚庸教宣曰夷狄慕中國而求學不盡心以誨迪之
是遏抑其良心也外國生俱感悅厚贄金以獻者再固
却之外國生以聞被命宣受母辭宣乃受慶成宴坐次

未定僉曰須決之劉太常宣歷舉舊制以對遂為定規於言官往來甚簡曰是非大臣親狎之地卒贈資政大夫諡文懿宣性耿介持大體疾惡不少徇多知國家典故惡輕改作常曰後生少年輕舉妄動利未至而害先之國家何賴焉人以為確論為文以理勝不喜新奇所著名冲澹集

通志參萬
歷府志

彭華字彥實安福人年十九領江西鄉薦景泰甲戌會試第一選庶吉士修寰宇通志授本院編修又與修大明一統志成化乙酉奉命典應天鄉試陞侍讀充經筵日講官進尚書講章皆規箴語壬辰殿試克受卷官宴禮部是日兄彭時充讀卷官兄彥充儀制郎中弟禮第進

士皆與宴士林榮之陞侍讀學士東宮立賜誥命尋陞詹事府詹事以東宮保傅久設獨詹事員缺慎簡學行老成之人故有是命三載秩滿特命兼翰林學士晉階通議大夫甲辰奉命主考會試有權貴子已在取列及拆號硃墨卷互異衆莫定華徐曰此簾外防閑疎也竟黜之陞吏部左侍郎仍兼學士入內閣叅機務時道家者流方進用南昌人李孜省尤得幸自小吏超列九卿小人多蟻附之華嘆曰聖明在上奈何使此輩得汚班行屏不與通年六十有五卒命有司諭祭遣官治葬事贈資政大夫太子少傅諡文思華少業春秋以士習不根經傳故其考兩京及禮闈命題必主於傳傳求合於

經文以不悖胡氏者為上第數十年天下翕然從風華之功也為文力追古人法度謹嚴數易稿而後成作詩亦然有素菴集

安福縣志

按彭華明史附萬安傳內云深刻多計數善陰伺人短與安攷省比嘗嗾蕭彥莊攻李秉文又逐尹旻羅璟人皆惡而畏之似此則華雖有文學行近比周而安福志傳則以為聞李攷省以小吏超列九卿屏不與通與明史不合因并記之又通志本人物志稍畧亦云道流李攷省尤得幸或稱華因以致大位蓋隱約其詞云爾

尹直字正言泰和人景泰五年進士改庶吉士授編修成化初充經筵講官與修英宗實錄總裁欲革去景泰帝號引漢昌邑更始為比直辨曰實錄中有初為大臣後為軍民者方居官時則稱某官某既罷去而後改稱如漢府以謀逆降庶人其未反時書王書叔如故也豈有逆計其反而即降從庶人之號者哉且昌邑旋立旋廢景泰帝則為宗廟社稷主七年更始無所受命景泰帝則策命於母后當時定傾危難之中微帝則京師非國家有雖易儲失德然能不惑於盧忠徐振之言卒全兩宮以至今日其功過足相準不宜去帝號時不能難既成進侍讀歷侍讀學士六年上疏乞纂修大明通典并續成宋元綱目章下所司十一年遷禮部右侍郎辭不

許丁父憂服除起南京吏部右侍郎就改禮部左侍郎
二十二年春召佐兵部占城王古來為安南所逼棄國
來求援議者欲送之還直曰彼窮來歸我若驅使還國
是殺之也宜遣大臣即詢量宜處置詔從之命都御史
屠滸往貴州鎮巡官奏苗反請發兵廷議將從之直言
起釁邀功不可信命官往勘果無警是年九月改戶部
兼翰林學士入內閣踰月進兵部尚書加太子太保直
明敏博學練習朝章而躁於進取性矜忌不自檢飭與
吏部尚書尹旻相惡直初覲禮部侍郎而旻薦他人直
以中旨得之次日遇旻於朝舉笏謝旻曰公所謂簡在
帝心者自是怨益深後在南部八年鬱鬱不得志屬其

黨萬安彭華謀內召旻輒持不可諸朝臣亦皆畏直幸
其在南及推兵部左右侍郎吏部列何琮等八人詔用
琮而直以安華及李孜省力中旨召還至是修怨與孜
省等比陷旻父子得罪又構罷江西巡撫閔珪物論宣
然不平刑部郎袁清者安私人又幸於內侍郭閏勘事
浙江輟轢諸大吏吏部尚書李裕惡之比還即除紹興
知府清懼累章求改裕極論其罪下詔獄安閏以屬直
為言於孜省取中旨赦之改知鄖陽孝宗立進士李文
祥御史湯鼐姜洪繆樗庶吉士鄒智等連章劾直給事
中宋琮及御史許斌言直自初為侍郎以至入閣夤緣
攀附皆取中旨帝於是薄其為人令致仕宏治九年表

賀萬壽并以太子年當出閣上承華箴引先朝少保黃
淮事冀召對帝却之正德中卒諡文和 明史

按史傳尹直初頗著聲朝列商輅薦其學問優長論
事亦有風裁然末路比附黃緣通志按劉宣傳後云
舊志有尹直傳末路附李孜省以進公論難掩又列
卿錄謂直所著瑣綴錄力詆吳與弼之為人及諸勝
已者悉加媒孽語與史傳相合然功過既明於郡志
中似不可削特取明史傳登之亦錄彭華一例也

龍文字士郁泰和人榮子登正統元年第擢中書舍人陞
吏部驗封員外郎文選郎中以清慎得名天順初陞
京工部侍郎尋卒 泰和志

泰和志按云明一統志龍文字彦祥與此異又宏治
志稱文以冠帶舉人擢中書

彭禮字彥中安福人彭華弟也第進士授兵部職方主事
歷遷員外郎中晉太僕卿上言自古牧馬多在監苑未
聞寄養民間今寄馬駒歲課無窮而民間戶丁生長有
限以有限之丁責無窮之駒困何由蘇請定種馬之額
為十萬歲取駒二萬五千高壯者備歲用不堪者變價
貯太僕庫以資買補兵部奏行之於是兩京種馬始有
定額陞工部侍郎改都察院左副都御史巡撫應天風
紀振肅累疏乞休得旨致仕歸性坦夷不拘小節直行
已志以故寡諧於俗然義利之辨甚嚴嘗語人曰孝弟

言安府志 卷四十一
立德之基廉介入官之本基虧而本不正雖有他才無以為也及卒囑其子無請祠所著有坦洞藁萬曆府志 參通志

歐陽旦字子相安福人成化辛丑進士授休寧令復二程

之祠表忠孝之墓有治狀召為御史民祠祀之宏治初

條時政七事歷官浙江督學副使應天府尹陞南京都

察院右副都御史仕宦三十五年清節始終一致平生

寬厚坦夷急人之難成人之美親戚無貴賤咸稱之弟

哲字子履甲辰進士廣東提學僉事才行與兄實相伯

仲云萬曆府志 參通志

按明史旦附姜洪傳後內云擢御史時嘗條陳逐劉

吉罷皇莊諸事

劉丙字文煥安福人南雄知府實孫也成化末登進士選

庶言士改御史巡按雲南雲南諸司吏舊不得給由父

滿子代丙請如例考入官流戍僉發必經兵部多淹延

致死丙請屬之撫按土官無後者請錄其弟姪勿令妻

妾冒冠服俱著為例後督兩淮鹽課中官請引二萬為

織造費部議許之丙執不得減四之三歷福建四川副

使俱督學校三遷四川左布政使正德六年以右副都

御史巡撫湖廣所部鎮溪千戶所算子坪長官司與貴

州銅仁四川酉陽梅桐諸土司犬牙相錯宏治中鎮溪

苗龍麻陽與銅仁苗龍童保聚眾攻剽土官李椿等實

縱之而算子百夫長龍真與通謀後遂四出劫掠遠近

騷然先後守臣莫能制丙將討之賊入連山深箐為拒
守計丙率師破其數寨賊走據天生崖及六龍山貴州
巡撫沈林兵繼至連攻破之前後擒童保等三百人斬
首八百九十餘級都指揮潘勛又破鎮筓諸寨擒麻陽
等百六十人斬首級如前餘賊遠遁璽書獎勵丙操履
清介敢任事所至嚴明法令修舉遷工部右侍郎採木
入山越二載犯風痺得疾卒詔贈尚書諡恭襄

明史

王懋中字與時安福人成化甲辰進士初知南樂教民節
儉婚嫁以時歲旱且蝗懋中致禱得雨蝗滅有大獄十
一年不決受監司委一訊而平之進刑部主事員外郎陞
雲南按察僉事歷山東按察使湖浙左右布政使擢右

副都御史巡撫雲南海口淤塞民田百萬餘畝督令所
司濬治遂為沃壤民受其利又奏免場課數事忌之者
衆以忤權貴罷歸己卯寧藩叛都御史王守仁知府伍
文定討平之懋中與有勞焉嘉靖初起巡撫鄖陽尋轉
兩京左右副都御史陞南右都御史卒於官贈太子少

保

萬歷府志

按通志懋中以忌之者衆遂上疏乞歸而萬歷府志
以為忤權貴罷歸通志謂宸濠叛懋中倡集義兵告
變於巡撫按守仁至豐城聞變不待懋中之告也府
志稱其與有勞焉為允

伍符安福人希淵子成化進士知寧波府才猷敏練不畏

權勢有貴家壻暴橫殺人符盡發其奸置之法擢四川右布政歷直隸巡撫會武宗南巡武臣劉暉宦官張忠並以寵倖前驅竊弄威福符正色與抗左右共嫉之駕旋有銀章之賜 通志

按安福志稱符居官興利除害卓有時望清十數年乾沒之賕以萬計充軍需止別省軍餉徵銀七萬兩有奇轉光祿卿忤權璫逮獄歲餘乃釋撫真定保定適武宗南巡調度撫綏上下得宜原傳失載今補錄

李貢字惟正吉水人成化進士歷官都御史會流賊猖獗出入畿甸貢嚴甲令謹斥堠有王指揮者內結錢寧外與賊通貢廉得其狀召至詰責使擒賊以自效賊平乃

寘之法擢兵部右侍郎以忤權貴意累疏乞歸卒 通志

周孟中字時可廬陵人成化進士歷官副都御史性剛毅重名節嘗講學白鹿洞來學之士每至數十人聽受問難娓娓不窮所著有畏齋集 通志

劉孟字子賢安福人成化進士歷諫垣十五年剛直敢言嘗劾罷文武官不職者五十六人壽寧侯壻錢銘怙寵滋惡孟具疏直糾寘於法復請罷鎮守太監免為地方之害勘三大營互爭民田九百頃為草場卒歸之民陞福建左叅政平白水峒劇寇陞僉都御史巡撫延綏逆瑾責賂逮獄濱死廷臣相率申救罷歸 參通志

趙璜字廷實安福人少從父之官墜江中不死稍長行道

上得遺金悉還其主登宏治三年進士授工部主事改兵部歷員外郎出為濟南知府猾吏舞文積歲為蠹璜擇愿民教之律令得通習者二十餘人逐吏而代之漢庶人牧場久籍於官募民佃德王府奏乞之璜勘還之民閱七年政績大著正德初擢順天府丞未至劉瑾惡璜坐巡撫朱欽事逮下詔獄除名瑾誅復職遷右僉都御史巡撫宣府尋調山東河灘地數百里賦流民墾而除其租番僧乞徵以充齋糧帝許之璜力爭得免曲阜為賊破闕里林廟在曠野璜請移縣就闕里從之擢工部右侍郎總理河道以邊警改理畿輔戎備事定命賑順天諸府饑還佐部事世宗即位進左侍郎掌部事裁

宦官賜葬費及御用監料價革內府酒醋麵局歲徵鐵輒價銀歲鉅萬嘉靖元年進尚書劉瑾劾元明宮糜財數十萬瑾死奸人獻為皇莊帝即位斥以予民既而中旨令仍舊璜言詔下數月而忽更示天下不信帝即報許會方修仁壽清寧宮費不繼璜因請與石景山諸房舍並斥賣以資用可無累民帝可之給事中徐景嵩等謂詔書許還民官不當自鬻劾璜璜疏辨并發景嵩他事御史張鵬翰言璜撫言官無大臣誼帝責鵬翰黨庇景嵩竟斥其同官陳江亦以劾璜被責求去給事中章僑言璜一舉逐兩諫官甚損國體尚書彭澤復奏僑非是僑再辨帝兩解之詔營后父陳萬言第估工值六十

萬璜持之萬言懇於帝下郎中員外二人詔獄璜言二臣無與乞罪臣帝不聽其後論救踵至萬言不自安再請貸二人獲釋工價亦大減三年顯陵司香內官言陵制狹小請改營視天壽山諸陵璜言陵制與山水相稱難概同帝納其言已帝欲遷顯陵璜不可乃寢詔建玉德殿景福安喜二宮璜請俟仁壽宮成徐議其事帝不許頃之以災異申前請帝始從之并罷仁壽役江西建真人府陝西督織造皆遣中使璜皆疏爭營建世廟中官所派物料戶部多裁省帝以問璜璜言曩造乾清坤寧兩宮所積餘貲足移用帝遂報可璜為尚書六年值帝初政銳意釐剔中官不敢撓故得舉其職後論執不

已諸權倖嫉者衆帝意亦寢疏璜素與秦金齊名考察自陳與金俱致仕廷臣乞留不許馳驛給夫廩如故事璜有幹局多智慮事毋錯他人相顧愕眙璜立辨既去人爭薦之十一年召復故官未至卒贈太子太保諡莊

靖

明史

羅欽順字允升泰和人宏治六年進士及第授編修遷南京國子監司業與祭酒章懋以實行教士未幾奉親歸因乞終養劉瑾怒奪職為民瑾誅復官遷南京太常少卿再遷南京吏部右侍郎入為吏部左侍郎世宗即位命攝尚書事上疏言久任超遷法當疏通不報大禮議起欽順請慎大禮以全聖孝不報遷南京吏部尚書省

親乞歸改禮部尚書會居憂未及拜再起禮部尚書辭
又改吏部尚書下詔敦促再辭許致仕有司給祿米時
張璠桂萼以議禮驟貴秉政樹黨屏逐正人欽順耻與
同列故屢詔不起里居二十餘年足不入城市潛心格
物致知之學王守仁以心學立教才知之士翕然師之
欽順致書守仁畧曰聖門設教文行兼資博學於文厥
有明訓如謂學不資於外求但當反觀內省則心正意
誠四字亦何所不盡必於入門之際加以格物工夫哉
守仁得書亦以書報大畧謂理無內外性無內外故學
無內外講習討論未嘗非內也反觀內省未嘗遺外也
反復二千餘言欽順再以書辨曰執事云格物者格其
心之物也格其意之物也格其知之物也正心者正其
物之心也誠意者誠其物之意也致知者致其物之知
也自有大學以來未有此論夫謂格其心之物格其意
之物格其知之物凡為物也三謂正其物之心誠其物
之意致其物之知其為物也一而已矣就三而論以程
子格物之訓推之猶可通也以執事格物之訓推之不
可通也就一物而論則所謂物果何物耶如必以為意
之用雖極安排之巧終無可通之日也又執事論學書
有云吾心之良知即所謂天理致吾心良知之天理於
事物則事事物物皆得其理矣致吾心之良知者致知
也事事物物各得其理者格物也審如所言則大學當

云格物在致知不當云致知在格物與物格而后知至
矣書未及達守仁已歿欽順為學專力於窮理存心知
性初由釋氏入既悟其非乃力排之謂釋氏之明心見
性與吾儒之盡心知性相似而實不同釋氏之學大抵
有見於心無見於性今人明心之說混於禪學而不知
有千里毫釐之謬道之不明將由於此欽順有憂焉為
著困知記自號整菴年八十三卒贈太子太保諡文莊

明史儒
林傳

通志云是時文成之教盛行江右士大夫之高明者
羣起而尊其說獨羅文莊書尺往復辨晰幾數千言
蓋文莊矯釋氏之空寂文成破俗儒之支離各有指

歸亦如朱陸同時所見不必盡同也後學不察乃至
自立門戶紛紛聚訟夫豈曰先賢之教之初心乎又

按先生所著有整菴存藁續藁系跋後段亦
通志舊錄

黃黎洲曰先生之學始從庠前柏樹子話頭得悟一
夕披衣通身汗下自怪其所得之易反而求之儒不
合也始知佛氏以覺為性以心為本非吾儒窮理盡
性至命之旨乃本程朱格致之說而求之積二十年
始有見於所謂性與天道之端一口打并則曰性命
之妙理一分殊而已矣又申言之曰此理在心目間
由本而知末萬象紛紜而不亂自末而歸本一真湛
寂而無餘因以自附於卓爾之見如此亦可謂苦且

難矣

劉玉字咸粟萬安人祖廣衡永樂末進士終刑部尚書父喬成化初進士累官湖廣左布政使玉登宏治九年進士授輝縣知縣發粟賑饑奏蠲虛稅復業者千家擢御史初孫伯堅金琦王寧皆以傳奉得官已又以指揮胡震為都指揮分守通州玉抗疏言傳奉不已繼之內批累聖德乞皆罷之不納武宗即位甫四月災異迭見玉陳修省六事出按京畿中官吳忠奉命選后妃肆貪虐玉奏不問劉健謝遷罷玉馳疏言劉瑾等佞倖小臣巧戲弄投陛下一笑顧讒邪而棄輔臣此亂危所自起况今白虹貫日彗見紫微宮星搖天王之位民窮財殫所在空虛陛下不改圖天下將殆乞置瑾等於理仍留健遷輔政不報玉遂引疾歸後瑾榜玉奸黨復誣構之罰輸粟塞下者二最後逮繫詔獄削籍放歸瑾誅起河南僉事遷福建副使皆董學政正德十五年累擢南京右僉都御史提督江防宸濠反攻安慶玉以舟師赴援事定改撫鄖陽世宗即位召為左僉都御史論遏亂功進右副都御史嘉靖元年改左厯刑部左右侍郎初偕九卿爭興獻帝不宜稱皇及帝欲考獻帝又偕廷臣伏闕哭爭六年秋坐李福達獄削籍卒於家玉所居僅庇風雨天文地理兵制刑律皆有論著隆慶初贈刑部尚書諡端毅子慈南京工部右侍郎厯官亦有聲

明史

大臣

按廣衡舊府志傳語與明史畧同劉慈另據舊志立傳

李中字子庸吉水人正德九年進士楊一清為吏部數召中應言官試不赴及授工部主事武宗自稱大慶法王建寺西華門內用番僧住持廷臣莫敢言中拜官三月即抗疏曰曩逆瑾竊權勢焰薰灼陛下既悟誅之無赦聖武可謂卓絕矣今大權未收儲位未建蕪子未革紀綱弛風俗日壞小人日進君子日退士氣日靡言路日閉名器日輕賄賂日行禮樂日廢刑罰日濫民財日殫軍政日敝瑾既誅矣而善治一無可舉者由陛下惑冀端啟也夫禁掖嚴邃豈異教所得雜居公乃建寺西

華門內延止番僧日與聚處異言日沃忠言日遠用舍顛倒舉錯乖方政務廢弛職此之故伏望陛下翻然悔悟毀佛寺出番僧妙選儒臣朝夕勸講攬大權以絕天下之奸建儲位以立天下之本革蕪子以正天下之名則所謂振紀綱勵風俗進君子退小人諸事可次第舉矣帝怒罪將不測以大臣救得免踰日中旨謫廣東通衢驛丞王守仁撫贛州檄中叅其軍事預平宸濠世宗踐阼復故官未任擢廣東僉事再遷廣西提學副使以身為教擇諸生高等聚五經書院五日一登堂講難三遷廣東右布政使忤總督及巡撫御史坐以不稱職當罷霍韜署吏部事稱中素廉節有才望當留會政府有

不悅者降四川右叅政十八年擢右僉都御史巡撫山東歲歉令民捕蝗者倍予穀蝗絕而饑者濟擒劇盜關繼光隣境攘其功中不與辯進副都御史總督南京糧儲御史金燦按四川時嘗薦中中不謝燦憾之至是摺他事誣劾方議調用而中卒光宗時追諡莊介中守官廉自廣西歸欲飯客貸米隣家米至又乏薪將以浴器爨會日已暮竟不及飯而別少學於同里楊珠既而擴充之沉潛邃密學者稱谷平先生門人羅洪先王龜年周子恭皆能傳其學中族人楷又傳洪先之學楷字邦正由舉人授湯溪知縣母艱服闋補青田時倭躡東南楷積穀資守禦青田故無城倭至楷禦於沙埠倭不得渡乃以間築城倭又至登陣守日殺賊數人倭遁去改

知昌樂亦以治行聞

明史

歐陽鐸字崇道秦和人正德三年進士授行人上書極論時政不報使蜀府王厚遺之不受歷工部郎中改南兵部出為延平知府毀淫祠數十百所以其材葺學官司禮太監蕭敬家奴殺人寘之法調福州議均徭曰郡多士大夫其士大夫又多田產民有產者無幾耳而徭則盡責之民請分民半役士大夫率不便巡按御史汪珊力持之議乃行嘉靖三年擢廣東提學副使累遷南京光祿卿歷右副都御史巡撫應天十府蘇松田不甚相懸下者畝五升上者至二十倍鐸令賦最重者減耗米

吉安府志 卷四十一
派輕齎最輕者徵本色增耗米陰輕重之賦乃均諸推
收田從圩不從戶詭寄無所容州縣荒田四千四百餘
頃歲勒民償賦鐸以所清漏賦及他奇羨補之議徭役
及裁郵置費凡數十百條民皆稱便遷南京兵部侍郎
進吏部右侍郎九廟災自陳去鐸有文學內行修潔仕
雖通顯家具蕭然卒贈工部尚書諡恭簡 明史

歐陽重字子重廬陵人正德三年進士殿試對策歷詆闕
政授刑部主事劉瑾兄死百官往弔重不往張銳錢寧
掌廠衛連構搢紳獄重皆力與爭銳等假他事繫之獄
贖杖還職仍停俸再遷郎中歷四川雲南提學副使遷
浙江按察使未上嘉靖六年春拜右僉都御史巡撫應

天會尋甸土酋安銓鳳朝文反廷議以重諳滇事乃改
雲南初武定土知府鳳詔母子坐事留雲南朝文給其
衆言詔已戮官軍將盡滅其部黨以故諸蠻悉從為亂
攻圍會城重督兵擊敗之遣詔母子還故地其黨愕眙
相率歸之朝文計窮絕普渡河走追兵至殲焉銓逃尋
甸故巢官軍攻破其砦執銓賊盡平乃散其黨二萬人
遷尋甸府於鳳梧山下更設守禦千戶所重推功於言
撫臣傅習並進秩任子緬甸木邦隴川孟密孟養諸首
相讐殺各訐奏於朝下重等勘覆遣叅政王汝舟知府
嚴時泰等遍歷諸蠻譬以禍福皆還侵他供貞如故重
列善後數事悉報可賜璽書褒諭重乃卹創殘賑貧二

輕徭賦規畫鹽鐵商稅屯田諸務民咸便之雲南歲貢金千兩費不貲大理太和蒼山產奇石鎮守中官遣軍匠攻鑿山崩壓死無算重皆疏罷之浮費大省當是時鎮守太監杜唐黔國公沐紹勛相比為奸利長吏不敢問羣盜由此起重疏言盜率唐紹勛莊戶請究主者又奏紹勛任千戶何經廣誘奸人奪民產唐役占官軍歲取財萬計因極言鎮守中官宜革帝頗納其言頻下詔飭紹勛命唐還京待勘二人懼且怒遣人結張璉謀去重會重奉命清異姓冒軍弊都司久未報給餉後期唐等遂嗾六衛軍譁於軍門巡按御史劉臬以聞劾重及唐紹勛處置失當璉從中主之解重職責臬黨庇調外任唐紹勛不問都給事中夏言等抗章曰以軍士譟罪撫按紀綱謂何況重奉詔非生事臬言唐紹勛罪與重等今處分失宜無以服天下頃年士卒驕悍相效成風類以月糧借口如甘肅大同福州保定事變屢見失今不治他日當事之臣以此為諱專務姑息孰肯為陛下任事哉願曲宥二臣全朝廷之體帝怒奪言等俸重罷歸在道聞御史王化劾其為桂萼黨不勝忿抗疏陳辨請錄大禮大獄被逐諸臣而自乞褫職又言得紹勛所遣百戶丁鎮私書知行賄張璉乞其覆護璉奸佞不宜在左右璉疏辨帝以重失職怨望黜為民重以臬被誦言等奪俸皆由已致之復疏乞重譴代言官罪帝益怒

言安府志 卷四一
以已除名置不問重家居二十餘年言者屢薦竟不復
召 明史

王學夔字一卿安福人領鄉薦為郴州學正登正德甲戌
進士授刑部主事改吏部考功司疏諫南巡跪午門廷
杖之嘉靖初上謹始疏深見嘉納又疏抑戚畹宥言官
歷考功文選員外郎中晉太常卿遷福建叅議尋撫
鄖陽轉操江皆有平寇功進吏部侍郎四年擢南禮部
尚書轉吏部四疏乞休不允改兵部得請致仕立朝蹟
在銓司居多未嘗陰庇一士陰入一物家居敦儉素布
袍糲飯有儒生所不能堪者邑中人士謁見庭下多謝
去外飾更着粗敝惟恐見誚讓華靡之風為之一變晚

歲奉特恩存問者再卒年九十四贈太子少保諡莊簡

舊府志

按明史王學夔附王儀傳後內云正德時以吏部主
事諫南巡跪闕下受杖嘉靖初奏請裁戚畹又申救
言官歷考功文選郎中廉謹為時所稱嘗撫治鄖陽
有偽稱皇子者諸司議用兵學夔曰妄豎子耳密捕
致之辟累遷南京吏禮兵三部尚書

周煦字啟和安福人正德辛巳進士授行人擢御史清
雲貴有征討功按廣東風裁益著陞大理寺丞轉少卿
多所平反歷都察院左右僉副都御史署院事會有權
貴人獄無敢任之者煦執之不撓卒抵權貴人罪諸貴

人相顧側目圻內肅然卒於官贈刑部侍郎安福志

按通志周煦傳云少孤母許氏年十九厲節孀居煦弱冠領鄉試而母卒及登進士第即疏母節於朝詔旌其門授行人陞御史巡按雲貴適土寇犯順雲南巡撫關煦檄總鎮三司指畫方畧討平之事聞璽書獎勵并錄附

歐陽必進字任夫安福人登正德丁丑進士初授禮部主事歷浙江布政撫鄖陽奏罷文武不職者撫應天發倉活蘇松饑民以萬計移督兩廣軍務平欽州田州諸蠻立祠祀之陞工部尚書修二門建三殿調度有方民不知勞轉刑部尚書審錄刑獄辯釋冤枉晉吏部尚書嚴

舉措絕請託世宗稱其端慎老成賜王帶緋魚服尋致仕所著有白雲山人稿安福志

王學益字虞卿安福人嘉靖己丑進士授都水主事改武庫上疏清京衛及各省軍伍一湔宿滯遷職方員外進郎中時大司馬欲用某為將官學益執不可竟從所執當時兩賢之林希元陳伐安南學益寓書毛伯溫以為東南生靈所繫乞慎動以惠交人擢福建按察副使隨論邊功擢應天府丞巡撫貴州兼理軍務適貴之銅仁與湖之鎮筸諸苗構煽學益得土目心致宣慰感德誓報會有擠之者誣以稽怠被逮湖貴人士相率陳寃事乃白起南院僉都御史隨改北轉刑部左右侍郎南工

部尚書以疾乞休年六十七卒所著有兵曹疏議撫貴
按留撰著

安福志

郭宗臯字居弼萬安人嘉靖進士授庶吉士歷官兵部尚
書自入翰林雖專文學而於時政弛張輒能言其當否
逮佐樞密六軍紀律森嚴素以不虧臣節相勉訃聞贈
太子少保諡康介

通志

周宥字濟甫安福人嘉靖進士為吏部孤特鯁介引疾歸
十五年清約如寒士起補廣東漕使釐剔政商民兩
便之鎮撫八閩會山寇熾甚宥運籌擒勦口不言功進
一兵部侍郎督漕淮水橫奔幾齧徐城時議徙城以避之
宥按行周視力主開魁山渠水勢遂洩宥嘗遊羅文恭

洪先門學務踐履義利介然作十戒書壁間自警

通志

聶豹字文蔚永豐人正德十二年進士除華亭知縣濬陂
塘民復業者三千餘戶嘉靖四年召拜御史巡按福建
出為蘇州知府憂歸補平陽知府山西頻苦寇民無寧
居豹令富民出錢罪疑者贖得萬餘金修郭家溝冷泉
靈石諸關隘練鄉勇六千守之寇却廷議以豹為知兵
給事中劉繪大學士嚴嵩皆薦之擢陝西副使備兵潼
關大計拾遺言官論豹在平陽乾沒大學士夏言亦惡
豹逮下詔獄落職歸二十九年秋都城被寇禮部尚書
徐階豹知華亭時所取士也為豹訟寃言其才可大用
立召拜右僉都御史巡撫順天未赴擢兵部右侍郎尋

轉左仇鸞調宣大兵入衛豹陳四慮謂宜固守宣大宣
大安則京師安鸞怒伺豹過無所得乃已三十一年召
翁萬達為兵部尚書未至卒以豹代之奏上防秋事宜
又請增築京師外城皆報可是年秋寇大入山西覆總
兵官李涑軍大掠二十日而去總督蘇祐反以大捷聞
為巡按御史毛鵬所發章下兵部豹言寇雖有所掠而
我師斬獲過當實上元垂祐陛下威靈所致宜擇吉祭
告論功行賞帝喜進秩任子者數十人豹亦加太子少
保廕錦衣世千戶京師外城成進太子少傅南北屢奏
捷及類奏諸邊功豹率歸功於祐祭告行賞如初豹亦
進太子太保當是時西北邊數遭寇東南倭又起羽書

日數至豹本無應變才而大學士嵩與豹鄉里徐階亦
入政府故豹甚為帝所倚久之寇患日棘帝深以為憂
豹卒無所謀畫條奏皆具文帝漸知其短會侍郎趙文
華陳七事致仕侍郎朱隆禧請設巡視福建大臣開海
濱互市禁豹皆格不行帝大怒切責豹震懾請罪復辨
增官開市之非再下詔譙讓豹愈惶懼條便宜五事以
獻帝意終不澤降俸二級頃之竟以中旨罷而用楊博
代之歸數年卒年七十七隆慶初贈少保諡貞襄豹初
好王守仁良知之說與辨難心益服後聞守仁歿為位
哭以弟子自處及繫獄著困辨錄於王守仁說頗有異
同云明史

按聶豹明史本傳自為定論修通志時明史尚未出故僅據人文記畧立傳又原按云聶雙江立朝本末據識小錄識餘錄人物考學案所載不無異同所著尚有雙江集致知議畧良知辨諸書

毛伯溫字汝厲吉水人祖超廣西知府伯溫登正德三年進士授紹興府推官擢御史巡按福建河南世宗即位中官張銳張忠等論死其黨蕭敬章霽陰援之伯溫請并誅敬霽中官為屏氣嘉靖初遷大理寺丞擢右僉都御史巡撫寧夏李福達獄起坐為大理時失入褫職歸用薦起故官撫山西移順天皆未赴改理院事進左副都御史為趙府宗人祐棕所訐解官候勘已復褫職十五年冬皇嗣生將頒詔外國禮部尚書夏言以安南久

失朝貢不當遣使請討之遂起伯溫右都御史與咸寧侯仇鸞治兵待命以父喪辭不許明年五月至京上方畧六事會安南世孫黎寧遣陪臣鄭惟僚等懇莫登庸弒逆請興師復讐帝疑其不實命暫緩師敕兩廣雲南守臣勘報而命伯溫協理院事御史何維柏請聽伯溫終制不許伯溫引疾不出至禫除始起視事其冬遷工部尚書十七年春黔國公沐朝輔等以登庸降表至請宥罪許貢先是雲南巡撫汪文盛奏登庸聞發兵進討遣使潛覘帝已敕遵前詔進兵文盛又納安南降人武文淵策具言登庸可破狀復傳檄安南令奉表獻地及

是下朝輔奏付廷議僉言不可許乃改伯溫兵部尚書兼右都御史尅期啟行帝以用兵事重無必討意特欲威服之而兵部尚書張瓚無所畫視帝意為可否朝論多主不當興師顧不敢顯諫制下數月兩廣總督侍郎張經以用兵方畧上且言須兵三十萬餉百六十萬石欽州知州林希元則極言登庸易取請即日出師瓚不敢決復請廷議議上無成策帝不懌讓瓚師復止命伯溫仍協理院事明年二月帝幸承天詔伯溫總督宣大山西軍務俄選宮僚加兼太子賓客大同所轄鎮邊鎮川宏賜鎮河鎮虜五堡相距二百餘里極邊近賊帳自巡撫張文錦以築堡致亂後無敢議修者伯溫曰變所

由生以任用匪人非建議謬也卒營之募軍三千防守給以閒田永除其賦邊防賴焉錄功加太子少保是時登庸懼討數上表乞降帝亦欲因撫之遣侍郎黃綰招諭綰多所要求帝怒罷綰再下廷議咸言當討帝從之閏七月命伯溫鸞南征文武三品以下不用命者許軍令從事伯溫等至廣西會總督張經總兵官安遠侯柳珣叅政翁萬達張岳等議徵兩廣福建湖廣狼土官兵凡十二萬五千餘人分三哨自憑祥龍峒思陵州入而以奇兵二為聲援檄雲南巡撫汪文盛帥兵駐蓮花灘亦分三道進部署已定會鸞有罪召還即以珣代十九年秋伯溫等進駐南寧檄安南臣民諭以天朝興滅繼

絕之義罪止登庸父子舉郡縣降者以其地授之懸重
賞購登庸父子而宣諭登庸籍土地人民納款即如詔
書宥罪登庸大懼遣使詣萬達乞降詞甚哀萬達送之
伯溫所伯溫承制許之宣天子恩威納其圖籍并所還
欽州四峒地權令還國聽命馳疏以聞帝大悅詔改安
南國為安南都統使司以登庸為都統使世襲置十三
宣撫司令自署置伯溫受命歲餘不發一矢而安南定
由帝本不欲用兵故也論功加太子太保二十一年正
月還朝復理院事邊關數有警伯溫請築京師外城帝
已報可給事中劉養直言廟工方興物力難繼乃命暫
止其年十月張瓚卒伯溫代為兵部瓚貪贖在部

戎備盡墮伯溫會廷臣議上防邊二十四事軍令一新
言官建議請覈實新軍京軍及內府力士匠役以裕國
儲伯溫因上冗濫當革者二十餘條凡錦衣騰驤諸衛
御馬內官尚膳諸監素為中貴盤踞者盡在革中帝稱
善立命清汰宿弊頗釐而左右近習多不悅二十三年
秋順天巡撫朱方以防秋畢請撤客兵未幾寇大入直
逼畿輔帝震怒并械總督翟鵬遣戍斃方杖下御史舒
汀言方止議撤薊兵而并撤宣大則伯溫與職方郎韓
最也帝遂削伯溫籍杖最八十戍極邊伯溫歸疽發背
卒穆宗立復官賜卹天啟初追諡襄懋伯溫氣宇沉毅
飲啖兼十人臨事決機不動聲色安南之役萬達兵策

為多伯溫力薦於朝二人遂得任用

明史

通志按云伯溫所著名東塘集今傳者止平南錄一卷詩選一卷奏議二卷而已今按東塘集七種共二十卷俱存

歐陽德字崇一泰和人甫冠舉鄉試之贛州從王守仁學不應會試者再嘉靖二年策問陰詆守仁德與魏良弼等直發師訓無所阿竟登第除知六安州建龍津書院聚生徒講學入為刑部員外郎六年詔簡朝士有學行者為翰林乃改德編修遷南京國子司業作講亭進諸生與四方學者論道其中尋改南京尚寶卿召為太僕少卿以便養復改南京鴻臚卿父憂服闋留養其母與

鄒守益聶豹羅洪先日講學以薦起故官累遷吏部左侍郎兼學士掌詹事府母憂歸服未闋即用為禮部尚書喪畢之官命直無逸殿時儲位久虛帝惑陶仲文二龍不相見之說諱言建儲德懇請會有詔二王出邸同日婚德以裕王儲貳不當出外疏言曩太祖以父婚子諸王皆處禁中宣宗孝宗以兄婚弟始出外府今事與太祖同請從初制帝不許德又言會典醮詞主器則曰承宗分藩則曰承家今裕王當何從帝不悅曰既云王禮自有典制如若言何不竟行冊立耶德即具冊立儀上帝滋不悅然終諒其誠婚亦竟不同日裕王母康妃杜氏薨德請用成化朝紀淑妃故事不從德遇事侃侃

裁制諸宗藩尤有執或當利害衆相顧色戰德意氣自如當是時德與徐階聶豹程文德竝以宿學都顯位於是集四方名士於靈濟宮與論良知之學赴者五千人都城講學之會於斯為盛德器宇溫粹學務實踐不尚空虛晚見知於帝將柄用而德遽卒贈太子少保諡文莊族人瑜字汝重亦學於守仁守仁教之曰常欲然無自是而已瑜終身踐之舉於鄉不就會試曰老親在三公不與易也母死廬墓側虎環廬嗥不為動歷官四川叅議所至有廉惠聲年近九十而卒

明史儒林傳

按文莊所著有南野集大約與羅整菴聶雙江諸公論學書居多

周廷字南喬吉水人嘉靖二年進士除潛江知縣改新會擢兵科給事時議新建伯王守仁罪將奪其爵廷抗疏為訟坐謫太倉州判官歷南京吏部郎中出為廣東叅政撫安南征黎寇皆預有功三遷廣東左布政使以右副都御史巡撫應天靖海寇林成亂進兵部右侍郎提督兩廣軍務召為刑部左侍郎歷南京右都御史吏兵二部尚書嘉靖三十四年召為左都御史帝用給事中徐浦議令廷臣及督撫各舉邊才於是故侍郎郭宗臯都御史曹邦輔吳嶽祭酒鄒守益修撰羅洪先御史吳悌方涯主事唐樞叅政周大禮曹亨叅議劉志知府皇華在舉中御史羅廷唯駁曰浦疏本言邊才而今廷臣

乃以清修苦節實學懿行舉去初議遠矣况又有夤緣
進士只假明詔開倖門帝納其言責吏部濫舉命與都
察院更議延與尚書吳鵬等言所舉皆人望公無私帝
終不悅切責延等而舉者悉報罷世宗時海內賢士大
夫被斥者衆及是舉上稍冀復用而為廷唯所阻自是
皆不復召矣延顏面寒峭砥節奉公權臣用事政以賄
成延未嘗有染然居臺端七年無諫諍名卒官贈太子

太保諡簡肅

明史

羅欽忠泰和人欽順弟嘉靖進士登第時其文行四方以
為式與王守仁李夢陽結社學為詩文有聲歷官至通
政司叅議得告省侍家居復起為通政使轉副都御史

督儲南京有召疾不果赴卒於家

縣志

楊載鳴字虛卿泰和人嘉靖進士授潮州推官憂闋補登
州擢為吏部稽勲主事掌銓事清銓法應補缺先令呈
報外官文憑按季類付御史分致所屬內外吏承無所
媒其利會行取天下官中有以他事被劾者事連載鳴
謫將樂典丈量移惠州推官尋轉南京吏部郎累陞至
通政使亮節峻履不愧士奇後著有大拙堂稿惠州志

困喻錄

縣志叅
通志

張雨字惟時萬安人嘉靖戊戌進士授大名府清豐令擢
雲南道御史諫建四親廟按甘肅貴州密疏大將軍仇
鸞不公遂鸞下獄直聲大振陞大理寺左少卿以鄭襄

功擢僉都御史鎮撫全楚移撫兩廣乞休歸里所著有
匏洲集從祀鄉賢

縣志

宋儀望字望之永豐人嘉靖二十六年進士授吳縣知縣
民輸白糧京師輒破家儀望令諸區各出公田計役授
田贍之禁火葬劄子游祠建書院惠績甚著徵授御史
劾大將軍仇鸞挾寇自重疏留中已陳時務十二策巡
鹽河東請開桑乾河通宣大餉道言河發源金龍池下
甕城驛古定橋會衆水東流千餘里入盧溝橋其間惟
大同卜村有叢石宣府黑龍灣石崖稍險然不踰五十
里水淺者猶二三尺疏鑿甚易曩大同巡撫侯鉞嘗乘
小艇赴懷來歷卜村黑龍灣安行無虞又自懷來泝流

載米三十石達之古定河足利漕可徵時方行窳運率
三十石致一石儀望疏至下廷議兵部尚書聶豹言河
成便漕兼制敵騎工部尚書歐陽必進言道遠役重遂
報罷儀望尋省母歸還朝發胡宗憲沅鶚奸貪狀鶚被
逮二人皆嚴嵩私人嵩由是不悅及受命督三門殿工
嵩子世蕃私賈人金屬必進俾與工事儀望執不可工
竣叙勞擢大理右寺丞世蕃以為德儀望請急歸無所
謝世蕃益怒會災異考察京官必進遷吏部遂坐以浮
躁貶夷陵判官嵩敗擢霸州兵備僉事請城涿州除馬
戶逋稅進大名兵備副使改福建與總兵官戚繼光合
兵破倭因刈海防善後事詔從其請隆慶二年吏部尚

書揚博欲黜儀望考功郎劉一儒持之乃鐫二秩補四
川僉事四遷大理少卿萬曆二年張居正當國雅知儀
望才擢右僉都御史巡撫應天諸府奏減屬郡災賦海
警稍定將吏諱言兵儀望與副使王叔果修戰備倭果
至禦之黑水洋斬獲多進右副都御史先有詔雪建文
諸臣儀望創表忠祠祀之南京宋忠臣楊邦乂儀望鄉
人也葬江寧歲久漸湮儀望為封其墓載其祠祀典故
太常卿袁洪愈祭酒姜寶皆不為居正所喜儀望薦之
朝漸失居正意四年稍遷南京大理卿踰年改北被劾
罷歸儀望少師聶豹私淑王守仁又從鄒守益歐陽德
羅洪先遊守仁從祀儀望有力焉家居數年卒

明史

朱衡字士南萬安人嘉靖十一年進士歷知尤溪婺源有
治聲遷刑部主事歷郎中出為福建提學副使累官山
東布政使三十九年進右副都御史巡撫其地奏言比
遼左告饑暫弛登萊商禁轉粟濟之猾商遂竊載他貨
往來販易並開青州以西路海島亡命陰相構結禁之
便從之召為工部右侍郎四十四年進南京刑部尚書
其秋河決沛縣飛雲橋東注昭陽湖運道淤塞百餘里
改衡工部尚書兼副都御史總理河漕衡馳至決口舊
渠已成陸而故都御史盛應期所開新河自南陽以南
東至夏村又東南至留城故址尚在其地高河決至昭
陽湖止不能復東可以通運乃定議開新河築堤呂孟

湖以防潰決河道都御史潘季馴以為濬舊渠便議與
衡不合衡持益堅引鮎魚薛沙諸水入新渠築馬家橋
堤以遏飛雲橋決口身目督工効罷曹濮副使柴涑重
繩吏卒不用命者浮議遂起明年給事中鄭欽劾衡虐
民倖功詔遣給事中何起鳴往勘工垂竣矣及秋河決
馬家橋議者紛然謂功不可成起鳴初至衡議亦變其
說與給事中王元春御史王襄交章請罷衡會新河已
成乃止河長一百九十四里漕艘由境出入通行至南
陽未幾季馴以憂去詔衡兼理其事隆慶元年加太子
少保山水驟溢決新河壞漕艘數百給事中吳時來言
新河受東充以南費嶧鄒滕之水以一堤捍羣流豈能

不潰宜分之以殺其勢衡乃開支河四洩其水入赤山
湖明年秋召還部又明年衡上疏曰先臣宋禮濬治舊
渠測量水平計濟寧平地與徐州境山巔相準北高南
下懸流三十丈故魯橋閘以南稍啟立涸舟行半月始
達東兗之民增閘挑淺苦力役者百六十年屬者改鑿
新渠遠避黃流舍卑就高地形平行諸閘不煩啟閉舟
行日可百餘里夫役漫無事事近河道都御史翁大立
奏請裁革宜可聽於是汰閘官五夫役六千餘以其僦
直為修渠費四年秋河決睢寧起季馴總理明年冬閱
視河道給事中雒遵劾罷季馴言廷臣可使無出衡右
者六年正月詔兼左副都御史經理河道穆宗崩大學

士高拱以山陵工請召衡會邳州工亦竣衡遂還朝衡先後在部禁止工作裁抑浮費所節省甚衆穆宗時內府監局加徵工料濫用不貲衡隨時執奏未幾召南京織造太監李祐趨辦袍緞千八百餘疋衡因言官孫枝姚繼可嚴用和駱問禮先後諫再疏請從之帝切責太監崔敏傳令南京加造緞十餘萬疋衡議停新造但責歲額得減新造三之二命造鰲山燈計費三萬餘兩又命建光泰殿瑞祥閣於長信門衡皆奏止之及神宗即位首命停織造而內臣不即奉詔且請增織染所顏料衡奏爭皆得請皇太后傳諭發帑金修涿州碧霞元君廟衡復爭報聞衡性强直遇事不撓不為張居正所喜

萬曆二年給事中林景暘劾衡剛愎衡再疏乞休詔加太子太保馳驛歸其年夏大雨壞昭陵陵稜恩殿近論督工罪奪官保卒年七十三子維京自有傳

明史

通志按云朱衡所著有鐘山集

尹臺字崇基永新人嘉靖乙未進士世宗覽其所對策命與一甲並梓改庶吉士授編修克會試同考官策問重臣權臣錄呈上取臣鑒錄賢姦傳省覽為之感動或謂輔臣嚴嵩曰權臣蓋指公也嵩陽為好語心銜之尋以春坊右中允管國子司業復以舊官兼翰林修撰承命主考南京鄉試策陳宗祖馭將制兵甚備上摘策中事密問嵩嵩方欲求婚好因善為對乃令子世蕃介其私

人置酒促席致求婚語臺竟確辭之出為南祭酒嵩舉酒訊曰先生行矣雖然則何以別不穀臺從容請曰楊繼盛誠狂生竊願相公左右之嵩避席對曰諾退屬王材復入言之嵩心動已乃謀諸鄔懋卿持不可楊竟論死改少詹事兼侍讀學士掌院事得入直尋傳御劄令侍郎尹臺代祭孔子以少詹事銜行祭出為南吏部右侍郎當京察黜陟惟允時以與嵩有郤者欲罷之有附嵩者欲庇之臺皆持不可善類獲賴以全詔舉邊才臺以王邦瑞曹邦輔胡松應詔後皆起為名臣陞南禮部尚書秩滿為御史劾奏奉旨為民萬厯元年詔起原任未朞又以言者論罷歸建崇正書院割田以給來學公

讀書至老不倦為文體裁一準西京詩歌儕建安天寶

間四方謁文者克戶卒年七十四

萬厯府志

通志按云尹臺所著有思補軒洞麓堂集數十卷永

新志若干卷

曾同亨字于野吉水人父存仁雲南布政使同亨舉嘉靖

三十八年進士授刑部主事改禮部遷吏部文選主事

故事丞簿以下官聽胥吏銓注同亨悉躬親之與陸光

祖李世達齊名隆慶初為文選郎薦用遺佚幾盡進太

常少卿請急去萬厯初起大理少卿歷順天府尹以右

副都御史巡撫貴州御史劉臺得罪張居正同亨臺姊

夫也給事中陳三謨欲並逐之奏同亨羸不任職詔調

南京遂移疾歸九年京察拾遺給事中秦耀御史錢岱等復希居正指列同亨名勒休致居正卒起南京太常卿召為大理卿遷工部右侍郎督治壽宮節浮費三十餘萬由左侍郎進尚書軍器自外輸率不中程奏請半收其直又請減織造之半皆報可汝安王妃乞橋稅同亨拒之帝竟如妃請內府工匠隆慶初數至萬五千八百人尋汰二千五百人而中官濫增不已同亨疏請清釐已得旨中官復奏寢之給事中楊其休疏爭弗納同亨弟乾亨請裁冗員以裕經費京衛諸武臣謂減已月俸也大譁伺同亨出朝圍而譟之同亨再乞休不得請丸門工成加太子少保力乞去詔乘傳歸起南京吏部

尚書辭不拜久之再起故官累辭乃就職稅使所在虐民同亨極諫三十三年大計京察與考功郎徐必達持正不撓是年北察失執政意中旨留給事中錢夢皋等南察及同亨自陳疏亦久不下同亨適給由入都遂引疾詔加太子太保致仕同亨初入吏部嚴嵩其鄉人尚書吳鵬則父同年也同亨無私謁嘗止宿署舍彌月不歸雅與羅汝芳耿定向善尚書楊博痛詆偽儒同亨曰此中多闇修非可槩斥即使陽假名義視呈身進取恬不知耻者孰愈哉卒年七十有五贈少保諡恭端弟乾亨字于健從羅洪先學登萬曆五年進士除合肥知縣調休寧擢御史給事中馮景劾李成梁被謫乾亨以尚

書張學顏右成梁也並劾之帝怒黜為海州判官稍遷大名推官歷光祿少卿十八年冬勅兼監察御史閱視大同邊務劾罷總兵官以下十餘人大同土兵歲餉萬二千石兵自徵之民不勝擾乾亨議留兵二百餘盡汰之屢奏邊備事宜輒中機要武弁之詬同亨也大學士王家屏遣諭之曰天下有叛軍寧有叛臣若曹於禁地辱大臣罪且死諸人乃散去尚書石星言貴臣被辱大傷國體給事中鍾羽正亦言之不報家屏密揭力爭乃奪掌後府定國公徐文璧祿半歲而治首事者以法乾亨尋進大理丞遷少卿考功郎趙南星以考察事被斥乾亨論救侵執政復移書辨之廷推巡撫者三俱不用

遂引疾歸未幾卒乾亨言行不苟與其兄並以名德稱

明史

按通志云同亨布政存仁子所著有泉湖山房集

蕭廩字可發萬安人祖乾元以御史劾劉瑾廷杖下獄終雲南副使廩舉嘉靖末進士授行人隆慶三年擢御史因地震請加禮中宮已出覈陝西四鎮兵食斥將吏隱占卒數萬人歸伍固原州海刺都之地密邇松山為楚府牧地廩言楚府封武昌牧地在塞下與寇接王所收四五百金而奸宄窟穴弊甚大宜諭使獻之朝廷詔可已改巡茶馬七苑牧地養馬八千七百餘匹而占地五萬五千三百頃有奇廩但給萬二千二百餘頃歲益課

二萬萬歷元年巡按浙江請祀建文朝忠臣十二人從祀王守仁於文廟尋擢太僕少卿再遷南京太僕卿九年由光祿卿改右僉都御史巡撫陝西時方覈天下隱田大吏爭希張居正指增賦廩令如額而止境內回回部常羣行拾麥穗間或草竊耀州以變告廩撫諭之戮數人變遂定令拾麥毋帶兵器儕偶不得至十人進右副都御史移撫浙江先以賞貢使歲增造綵幣二千廩請均之福建及徽寧諸府從之已請減上供織造不許遷工部右侍郎召改刑部進兵部左侍郎以官卒贈尚書廩初從歐陽德鄒守益遊制行醇謹故所至有立明史

通志按云蕭廩所著有微言集二卷

張綱字美中吉水人嘉靖癸未進士備兵潁州襄陽興屯田殲巨寇兩地皆立遺愛碑擢都御史巡撫河南按紅蓮妖獄釋其脅從裁一切冗費以蘇民困視爰書每至夜分嘗曰生靈繫吾一念敢自佚乎尋卒萬歷府志

彭黥字道顯安福人嘉靖癸未進士授祠祭主事乞南得儀制比滿考至京太宰將留之銓署友人諷使私謁不聽迺改光祿丞陞少卿繼遷南太常起艱復補太常未幾陞南光祿卿復改而北兢兢職事不敢懈故事宮禁取辦出中使傳命不可考驗黥調劑裁省而中使顧益畏愛莫敢相狎自光祿陞僉都御史撫山東適妖賊猝熾乃先以撫緝而翦其凶渠患以不延遷副都御史撫

河南河數徙其故道為灘田沒於王府盡括之官歲得數十萬頃之入以代虛稅貧民用甦而王府亦戢不得肆擢刑部右侍郎會王聯獄起株連士大夫至數十人黜委曲奏貸多從末減轉兵部左侍郎巡撫應天不以餽遺交際病有司所病逋負探其穴窟追償殆盡倭寇迫太倉兼程趨蘇蘇城門晝閉即下令盡開諸門以納奔潰復相度機宜為驅勦計先後擒斬至千餘級陞南工部尚書月餘寇復至言者以先事咎黜逮詔獄未幾罷為民黜為人沉篤純懿言不出口恂恂如儒生而以禮自防皎然如處女其中坦蕩不留他腸至遇叢冗臨患害迄不可動為太常時疏修省獨指斥貴戚僭越請

加檢制聞者避之

萬曆府志

歐陽塾字崇儒泰和人父誥以進士授南工部主事歷陞金華守調漢陽皆有惠政官至山東鹽運使塾登嘉靖丙戌進士授刑部主事改禮部累官應天府尹議賑饑民疏上未報盡發公廩便宜借貸所活甚多秩滿乞歸尋用薦起工部侍郎踰年艱歸塾平日慕羅欽順之為人家居置義田立家約捐渡關衢施藥埋骼卒贈右都

御史

舊府志

通志按云塾通志作塾宗儒府志作崇儒

劉慤字致卿萬安人王之仲子也嘉靖甲辰進士授工部主事遷郎中咸寧侯仇鸞怙寵請別創兵仗庫又請武

臣得造弓矢給直工部慤連疏奏格之尋守嘉興倭寇
 薄郡境峙餉繕兵濬葺屬邑城池造船製械郡賴以安
 陞按察副使民為生祠祀之有再生遺愛錄歷陞雲南
 按察使黔國舍人殺人匿不受訊慤竟縛之論如法擢
 巡撫湖廣都御史革元祐宮莊田奪其租備歲築漢堤
 之費歲大饑募夫濬竹筒等河七處水洩而地可耕役
 夫仰食官所全活甚衆平劇寇著有成績尤殫慮籌畫
 務垂永利事具所上奏議中入為大理卿尋轉南工部
 右侍郎道卒劉氏四世貴顯以清慎勲名相砥礪吉郡

稱世家云

萬曆府志

王士翹字民瞻安福人嘉靖戊戌進士授溧陽知縣踰年

以外艱去尋補瑞安皆以持廉秉公鋤強振弱得上下
 心而在瑞安久民尤德之既去為建仰厓亭留畫像以
 祀其為御史出視居庸三關三關京師北門諸陵在焉
 至則首輯關志已又嚴斥堠申要約及條陳增築城堡
 諸事威聲大振按廣西諸徭相戒斂迹境內以寧鞫重
 囚獄以郡縣所擬抵償人命初覆檢視不明致成疑枉
 乃著慎刑錄刊示所屬俾司刑者準式久之擢太僕大
 理少卿晉總理河道右僉都御史值河決民舍漂沒幾
 盡乃罷一切無名之供以賑饑溺民賴全活殆以萬計
 轉徙者得復業會通河塞漕運梗阻翹設法濬治用老
 人白英計遏汶水至南旺分上下流歲輓遂通遷右副

都御史總督南京糧儲濟寧士民為立遺愛堂於學宮
祀之以言官指其奏薦誑誤坐罷家居謝賓客歲時伏
臘與郡邑大夫一往復而已當未第時嘗苦不給既貴
無改於儒生時自少事繼母孝而友愛繼母弟尤篤俸
入稍贏輒捐其餘買田給穀以周五服親屬之急年七
十卒又置田復真書院以膳學者其同時從兄弟郡守
士俊郡判士任皆務為淳厚不以貴勢加於鄉族而士
任蚤受學鄒守益門及為桂東令有惠政民為立去思
碑暮年倡率鄉族舉惜陰會於元陽爐峰人稱長者

府志
安福志

按士翹安福志作仕翹

曾于拱字思極泰和人嘉靖辛丑進士授工部主事晉郎
中歷副使叅政左右布政使擢副都御史總督糧儲致
仕其在閩藩也當倭訏諸道兵雲集于拱蒿目焦思百
計取盈士各宿飽嘗言平賦均徭莫善條鞭弭盜安民
莫善保甲所至必舉行之有文集若干卷

通志

郭子章字相奎泰和人隆慶辛未進士授建寧府推官輿
過峻嶺有一猿號冤甚哀指其處發掘得屍按治之人
稱神明為潮州知府驅獨鬼著有異政督學四川文習
丕變歷浙江叅政山西按察使皆有異績陞任湖廣福
建布政予告歸時播首楊應龍恃功驕蹇不法糾苗倡
亂蜀黔楚三省望風摧陷起子章以副都御史巡撫貴

言安所志 卷四
州兼制楚蜀賜上方劍同總督李化龍舉用劉綎為提督屢出奇制勝是時餉詘不繼黔亂無民可派借楚蜀閩餉數十萬皆子章經畫賊東破重安遂圍興隆子章發鎮算及貴陽兵救援賊兵始退後又寇龍泉子章任楊惟中為都司卒得其力歃血誓師聲罪致討人思自奮庚子四月檄數應龍十大罪設壇北門集文武將吏土漢官兵擊之應龍亦身率各苗來決死戰子章會同劉綎親勒騎衝堅分兩翼追奔左監軍楊寅秋本同邑人復與同心一力期必滅賊破土月二城翼日遂破大城圍海龍固克之應龍闔室自焚生獲酋子朝棟兆龍等百餘人俘斬無算於是李化龍上露布表子章功第

一先是安酋與楊酋世姻聲勢依倚眾皆疑安氏為助欲併勦之子章獨撫慰安氏使為朝廷用廷臣疏子章為總督而上仍用為巡撫謂必得功而安酋始無患也貴陽兵後大饑死徙甚眾乃疏請湖廣長衡郴等府州縣欠協濟貴州餉銀七萬八千餘兩於內准發賑濟民賴以甦其後播逆餘黨有皮林及遵義有吳洪平越有路苗皆子章蕩平前後叙功加太子少保兵部尚書子

襲錦衣衛

參通志
府縣志

按萬厯志稱子章厯官多奇異世談奇者輒歸之然不以此為子章重也才本天授識卓人羣於書無所不讀尤精於易嘗與王塘南胡廬山鄒南臯講學於

青原白鷺之間主於倡明正學宦蹟所至隨地著書
燕閩晉粵蜀浙吳楚皆有草及平播錄易解行世又
有豫章大記一百卷然以子章學術經濟品望明史
獨無本傳今特參各志詳叙之

鄒元標字爾瞻吉水人九歲通五經泰和胡直嘉靖中進
士官至福建按察使師歐陽德羅洪先得王守仁之傳
元標弱冠從直遊即有志為學舉萬曆五年進士觀政
刑部張居正奪情元標抗疏切諫且曰陛下以居正有
利社稷耶居正才雖可為學術則偏志雖欲為自用太
甚其設施乖張者如州縣入學限以十五六人有司希
指更損其數是進賢未廣也諸道決囚亦有定額所司

懼罰數必取盈是斷刑太濫也大臣持祿苟容小臣畏
罪緘默有今日陳言而明日獲譴者是言路未通也黃
河泛濫為災民有駕蒿為巢啜水為餐者而有司不以
聞是民隱未周也其他用刻深之吏沮豪傑之才又不
可枚數矣伏讀敕諭朕學尚未成志尚未定先生既去
前功盡隳陛下言及此宗社無疆之福也雖然弼成聖
學輔翼聖志者未可謂在廷無人也且幸而居正丁艱
猶可挽留脫不幸遂捐館舍陛下之學將終不成志將
終不定耶臣觀居正疏言是有非常之人然後辦非常
之事若以奔喪為常事而不屑為者不知人惟盡此五
常之道然後謂之人今有人於此親生而不顧親死而

不奔猶自號於世曰我非常人也世不以為喪心則以為禽彘可謂之非常人哉疏就懷之入朝適廷杖吳中行等元標俟杖畢取疏授中官給曰此乞假疏也及入居正大怒亦廷杖八十謫戍都勻衛衛在萬山中夷獠與居元標處之怡然益究心理學學以大進巡按御史承居正指將害元標行次鎮遠一夕御史暴死元標謫居六年居正歿召拜吏科給事中首陳培聖德親臣上肅憲紀崇儒行飭撫臣五事尋劾罷禮部尚書徐學謨南京戶部尚書張士佩徐學謨者嘉定縣人嘉靖中為荊州知府景恭王之藩德安欲奪荊州城北沙市地學謨力抗不予為王所劾下撫按逮問改官荊州人德之

稱沙市為徐市居正素與厚萬曆中累遷右副都御史撫治鄖陽居正歸葬父學謨事之謹召為刑部侍郎越二年擢禮部尚書自宏治後禮部長非翰林不授惟席書以言大禮故由他曹遷萬士和不由翰林然先歷其部侍郎學謨徑拜尚書廷臣以居正故莫敢言居正卒學謨急締媵於大學士申時行以自固及奉命擇壽宮通政叅議梁子琦劾其始結居正繼附時行詔為奪子琦俸元標復劾之遂令致仕歸慈寧宮災元標復上時政六事中言臣曩進無欲之訓陛下試自省果無欲耶寡欲耶語云欲人勿聞莫若勿為陛下誠宜翻然自省加意培養當是時帝方壯齡留意聲色游宴謂元標刺

已怒甚降旨譙責首輔時行以元標已門生而劾罷其
媼學謨亦心憾遂謫南京刑部照磨就遷兵部主事召
改吏部進員外郎以病免起補驗封陳吏治十事民瘼
八事疏幾萬言文選缺員外郎尚書宋纁請用元標久
不獲命纁連疏趣之給事中楊文煥御史何選亦以為
言帝怒詰責纁謫文煥選於外而調元標南京刑部郎
中石星論救亦被譙讓元標居南三年移疾歸久之起
本部郎中不赴旋遭母憂里居講學從遊者日衆名高
天下中外疏薦遺佚凡數十百上莫不以元標為首卒
不用家食垂三十年光宗立召拜大理卿未至進刑部
右侍郎天啟元年四月還朝首進和衷之說言今日國

事皆二十年諸臣醞釀所成往者不以進賢讓能為事
日錮賢逐能而言事者又不降心平氣專務分門立戶
臣謂今日急務惟朝臣和衷而已朝臣和天地之和自
應向之論人論事者各懷偏見偏生迷迷生執執而為
我不復知有人禍且移於國今與諸臣約論一人當惟
公惟平毋輕搖筆端論一事當懲前慮後毋輕試耳食
以天下萬世之心衡天下萬世之人與事則議論公而
國家自享安靜和平之福因薦涂宗濬李邦華等十八
人帝優詔褒納居二日復陳拔茅闡幽理財振武數事
及保泰四規且請召用葉茂才趙南星高攀龍劉宗周
丁元薦而恤錄羅大紘雒于仁等十五人帝亦褒納初

元標立朝以方嚴見憚晚節務為和易或議其遜初仕時元標笑曰大臣與言官異風裁踔絕言官事也大臣非大利害即當護持國體可如少年悻動耶時朋黨方盛元標心惡之思矯其弊故其所薦引不專一途嘗欲舉用李三才因言路不與元標即中止王德完譏其首鼠元標亦不較南京御史王允成等以兩人不和請帝諭解元標言臣與德完初無纖芥此必人有交構其間臣嘗語朝士曰方今上在沖歲敵在門庭祇有同心共濟倘復黨同伐異在國則不忠在家則不孝世自有無偏無黨之路奈何從室內起戈矛耶帝嗣位已久而先朝廢死諸臣猶未贈卹元標再陳闡幽之典言益懇切

其年十二月改吏部左侍郎未到官拜左都御史明年典外察去留惟公御史潘汝正過庭諭雅有物議及庭諭秩滿汝正注考溢美元標疏論之兩人竝引疾去已言丁巳京察不公專禁錮異已請收錄章家正丁元薦史記事沈正宗等二十二人由是諸臣多獲昭雪又言明詔收召遺佚而諸老臣所處猶是三十年前應得之官宜添注三品崇秩昭陛下褒尊者舊至意帝納其言於是兩京太常太僕光祿三卿各增二員孫慎行之論紅丸也元標亦上疏曰乾坤所以不毀者惟此綱常綱常所以植立者恃此信史臣去年舟過南中南中士大夫爭言先帝猝然而崩大事未明難以傳信臣初不謂

然及既入都為人言先帝盛德宜速登信史諸臣曰言及先帝彌留大事令人閣筆誰敢領此臣始有疑於前日之言元輔方從哲不伸討賊之義反行賞奸之典即謂其無心何以自解於世且從哲秉政七年未聞建樹何事但聞馬上三日三趨戰喪我十萬師徒試問誰秉國成而使先帝震驚奸人闖宮豺狼當路儉邪亂政從哲何詞以對從來懲戒亂賊全在信史失今不成安所底止時刑部尚書黃克纘希內廷意羣小和之而從哲世居京師黨附者衆崔文昇黨復彌縫於內格慎行與衆議皆不得伸未幾慎行及王紀偕逐元標疏救不聽元標自還朝以來不為危言激論與物無猜然小人以

其東林也猶忌之給事中朱童蒙郭允厚郭興治慮明年京察不利已潛謀驅逐會元標與馮從吾建首善書院集同志講學童蒙首請禁之元標疏辨求去帝已慰留允厚復疏劾語尤妄誕而魏忠賢方竊柄傳旨謂宋室之亡由於講學將加嚴譴葉向高力辨且乞同去乃得溫旨興治及允厚復交章力攻興治至比之山東妖賊元標連疏請益力詔加太子少保乘傳歸陛辭上老臣去國情深疏歷陳軍國大計而以寡欲進規人為傳誦四年卒於家明年御史張訥請毀天下講壇力詆元標忠賢遂矯旨削奪崇禎初贈太子太保吏部尚書諡忠介童蒙既劾元標遂得罪清議尋以年例外遷及忠

賢得志三人竝召還歲餘允厚至戶部尚書太子太保童蒙至右副都御史巡撫延綏母死不持服為忠賢建生祠興治亦加太僕卿忠賢敗三人並麗逆案云

明史

按鄒忠介著作甚富俱詳藝文志

劉日升字扶生號明自廬陵人萬曆庚辰進士授福州推官訟獄繁囂悉釐奸雪罔其法多載洗冤錄歷陞尚寶鴻臚太僕至應天府府尹通籍四十載清介伉直不可私干每引功令與科臣爭職守糾劾諸勛衛不避權貴其學務實踐不事虛名師事王時槐又時與鄒元標等相叅證告歸後杜門絕造請留心里閤利病郡邑有所興除皆披誠以告復邑學廣社倉舉鄉約徵遞年改折

運蠲租賑饑弭盜善俗一一皆其擘畫尤喜推轂材品

護持善類年七十二卒詔贈南京工部右侍郎祀鄉賢

本邑特建專祠所著有慎修堂集

參通志

鄒德泳字汝聖號瀘水安福人萬曆丙戌進士官行人改

授御史神宗朝以建儲諫者罪至死言官相繼罷去德

泳抗疏力爭兼詆政府廷杖以救免免官家居三十年

修復古書院聚諸生講明正學皆推本守益遺教而其

言一以忠恕為本人士彬彬然一變光宗立即家拜尚

寶卿熹宗立疏上聖學十八條遷太常少卿歷通政太

常正卿上臨雍陳列祖芳規八條時魏璫疾不附已德

泳首疏自陳以刑部侍郎致仕璫生祠議起撫臣檄所

屬醜金公抹其籍曰序者不書姓名寫者尋復揭出差惡之心尚存請君從此中輟未幾璫敗免崇禎朝詔訪經明行修之儒有司以德泳應因請開講學宮著學庸歸旨卒於家上勅有司祭葬焉邑建祠祀之學者私諡為純道先生有湛源文集應求微旨平旦錄振玩錄復古紀事行於世

舊府志

謝應翔號鳳臯安福人萬曆辛丑進士授嘉善知縣在任均徭役清糧畝禁勢豪不得兼并積羨以修水口閣補貧士之不能輸將者嘉禾陋例縣官考成市商皆有餽贖應翔耻之槩却而俗變課士則達官巨公連續薦俱爭冠軍翔語之曰已有先得者矣詢薦者何人則曰嘉

善知縣謝某也其清耿如此所得士如錢士升魏大中虞廷陞皆為世名臣解任日舟輕如葉不能渡長江命家人載石其上行取入京以恬淡得南銓神廟特命入北銓先時掌選門如市公設水缸於署一切書札盡投其中廉操著聞晉太常大理陞山西巡撫魏璫煽虐以魏大中為翔門牆曾疏薦之嗾程九疇劾翔老病翔決意引去遂與鄒元標等同時追奪翔為人外嚴內寬家徒四壁杜門却掃題其堂曰晝掩當事造請不得一見邑有大利害必毅然爭之至今誦清介者必首推云

志

舊府志

曠鳴鸞字思恭號聲和廬陵人萬曆丁未進士初授丹陽

令舉卓異入為兵部主事丁內艱服闋補禮部郎中改尚寶司丞晉本司正卿以忤逆璫削奪歸田思宗兩詔起之再疏辭不允遷光祿寺卿轉順天府丞擢太僕寺正卿陞刑部侍郎鳴鸞少遊鄒元標門倡明正學入官有介節立朝侃侃幾中危法眷顧方隆遽以疾卒舊府志

朱世守字惟約號玉槎安福人萬曆乙未進士授行人陞吏部主事歷員外郎再掌大選門絕私交累遷至僉都御史刑部侍郎引年乞休召對賜宴馳驛回籍服官清真雖居要樞而不競不絀在籍三十餘年終始一節溫溫德隅人無間言稱完品云舊府志

蕭命官字拙修號拙菴廬陵人萬曆癸丑進士選庶吉士

尋授檢討陞編修分校會闈歷詹事府正詹天啓中推南京吏部侍郎以忤璫乞休疏入奉旨歸籍居家杜門著書與人接無城府好獎拔士類崇禎朝璫伏誅起公禮部右侍郎將大用而遽卒上聞慟悼予葬祭舊府志

蕭近高字抑之廬陵人萬曆乙未進士授中書舍人擢禮科給事中甫拜官即上疏言罷礦稅釋繫囚起廢棄三事明詔已頒不可中止帝怒奪俸一年頃之論江西稅使潘相擅刑宗人罪不報既而停礦分稅之詔下相失利擅移駐景德鎮請專理窵務帝即可之近高復力爭後江西撫按並劾相相以為近高主之疏詆甚力近高疏辨復劾相疏雖不行相不久自引去屢遷刑科都給

事中知縣滿朝薦諸生王大義等皆忤中使繫獄三年
近高請釋之不報遼東稅使高淮激民變近高劾其罪
請撤還帝不納又以淮誣奏逮同知王邦才叅將李獲
陽近高復論救會廷臣多劾淮者帝不得已徵還而邦
才等繫如故無何極陳言路不通耳目壅蔽之患未幾
又言王錫爵密揭行私宜止勿召朱賡被彈六十餘疏
不當更留皆不報故事六科都給事中內外遞轉人情
輕外率規避近高自請外補吏部侍郎楊時喬請亟許
以成其美乃用為浙江右叅政進按察使以病歸起浙
江左布政使所至以清操聞泰昌元年召為太僕卿廷
議紅丸之案近高言崔文昇李可灼當斬方從哲當勒

還故里張差謀逆有據不可赦以瘋癲歷工部左右侍
郎天啟二年冬引疾去御史黃尊素因言近高暨侍郎
余懋衡曹于汴饒伸太僕少卿劉宏謨劉宗周竝辭榮
養志清風襲人亟宜褒崇風勵有位詔許召還五年冬
起南京兵部添注左侍郎力辭不允時魏忠賢勢張諸
正人屏斥已盡近高不欲出遷延久之給事中薛國觀
劾其玩命遂落職崇禎初乃復卒於家

明史

通志按云近高所著有三垣奏藁

王振奇字石鯨安福人萬曆己未進士授工部主事同官
萬燝以陵工觸魏璫立斃朝士無敢言者振奇獨抗疏
白其寃歷官右僉都御史巡撫寧夏以勞瘁卒官贈卹

康新民號莊衢安福人萬厯丁未進士由縣令行取禮部
歷任浙江藩臬多治聲晉大理卿戶部侍郎陞刑部尚
書立朝丰裁稜厲不邇魏璫時推清介 通志

劉士禎號須彌萬安人天啟壬戌進士初授廣東韶州推
官會樂昌連山之獄株連甚衆禎讞之得其情力雪之
人交服其明允繼授廣西道御史上疏言五事一曰審
勢以培脉二曰虛衷以御下三曰核餉在精兵四曰安
民在獎廉五曰課績在修職上嘉納之尋奉巡按浙江
海塘衝決所在漂溺禎單騎行視以身先督諸守土不
數月而功告成復命巡按黔中安南盤江暴漲雷厲歲

溺無算禎請創雄城排山鎖水連雲永鎮時鎮遠苗巴
香等作亂禎勦撫有功加服俸二級以直聲見忌左遷
廣東廉使適惠陽兵火之後賊首鄒豺子等克焰不靖
禎攝惠潮事息心擘畫殲渠散黨惠潮以安未幾流寇
蹂躪荆沔深入藍臨以窺粵之惠昌兩路大吏交章薦
禎監軍奉命再至詔為制府前驅賊潰圍奔北有平寇
碑以紀其事繼陞福建右藩隨遷湖廣左藩楚三方受
寇薦加凶殪禎請蠲乞賑設粥平糶所活無算尋陞應
天府府尹籌度軍餉及期轉輸陞通政使司左政嚴禁
煩囂封駁章奏心切救時疏凡數上舉劾之事一秉於
公尋以疾乞休不允轉擢兵部左侍郎加刑部尚書賜

斗牛服所著有結霄樓澄觀樓藜光園稿三秉丹堂集

萬安志參
舊府志

按通志士禎傳稍畧然稱其為巡按時墨吏望風改轍歸家杜門絕干謁好延接名士士匱乏者悉請給焉其風采亦可想矣

李日宣字晦伯吉水人萬曆癸丑進士授中書舍人擢御史天啟元年遼陽破請帝時召大僚面決庶政尋請宥侯震暘以開言路厚中宮以肅名分忤旨切責已又薦丁元薦鄒維璉麻僖等十餘人乞召還朱欽相劉廷宣等帝以濫薦逐臣停俸三月旋出理河東鹽政還朝以族父邦華佐兵部引嫌歸五年七月逆黨倪文煥劾邦

華日宣為東林邪黨遂削籍莊烈帝即位復故官以邦華在朝久不出崇禎三年起故官巡按河南還朝掌河南道事中官王坤訐大學士周延儒日宣率同官言內臣監兵不宜侵輔臣且插款中疑邊情多故坤責亦不可追報聞遷大理丞屢進太常卿九年冬擢兵部右侍郎鎮守昌平久之進左侍郎協理戎政尋叙護陵功加兵部尚書十三年九月擢吏部尚書十五年五月會推閣臣日宣等以蔣德璟黃景昉姜曰廣王錫衮倪元璐楊汝成楊觀光李紹賢鄭三俊劉宗周吳甡惠世揚王道直名上帝令再推數人而副都御史房可壯工部右侍郎宋攻大理寺卿張三謨與焉大僚不獲推者為流

言入內且創二十四氣之說帝深惑之踰月召日宣及與推諸臣入中左門偕輔臣賜食已出御中極殿令諸臣奏對玫陳九邊形勢甚辯帝惡其干進叱之乃命德璟景昉牲入閣而以徇情濫舉責日宣等回奏奏上帝怒不解復御中左門太子及定永二王侍帝召日宣聲甚厲次召吏科都給事中章正宸河南道御史張煊及玫可壯三謨詰其妄舉日宣奏辯帝曰汝嘗言秉公執法今何事不私正宸奏日宣多游移臣等常劾之然推舉事實無所徇日宣復為玫等三人解帝命錦衣官提下日宣等六人竝褫冠帶就執時帝怒甚侍臣皆股栗失色德璟景昉牲叩頭辭新命因言臣等竝在會推中

若諸臣有罪臣等豈能出大學士周延儒等亦乞優容帝皆不許遂下刑部廷臣交章申救不納帝疑其未就獄責刑部臣尅期三日定讞侍郎惠世揚徐石麒擬予輕比帝大怒革世揚職鐫石麒二秩郎中以下罪有差御史王漢言枚卜一案日宣等無私陛下懷疑重其罪刑官莫知所執不聽獄上日宣正宸煊戍邊玫可壯三謨削籍久之赦還卒

明史

按通志傳云日宣授御史上疏請聖裔天潢開科會試加額報可旋命分練京營條陳積弊甚悉直聲聞於時巡視河南鹽政建傳是講堂興起正學宵人側目倪文煥指為日宣罪案迨循例迴避文煥遂有東

林渠魁尚伏一疏此段可補史傳所未詳附錄以備
叅攷

李邦華字孟闇吉水人受業同里鄒元標與父廷諫同舉
萬曆三十一年鄉試父子自相鏃礪布衣徒步赴公車
明年邦華成進士授涇縣知縣有異政行取擬授御史
值黨論初起朝士多詆顧憲成邦華與相拄遂指目邦
華東林以是越二年而後拜命陳法祖用人十事曰內
閣不當專用詞臣曰詞臣不得專守館局曰詞臣不當
教習內書堂曰六科都給事中不當內外間阻曰御史
陞遷不當概論考滿曰吏部乞假不當積至正郎曰關
倉諸差不當專用舉貢任子曰調簡推知不當驟遷京
秩曰進士改教不當概從內轉曰邊方州縣不當盡用
鄉貢疏上不報十一年福王之藩已有期忽傳旨莊田
務足四萬頃廷臣相顧愕眙計田數必不足則期將復
更然無敢抗言爭之者邦華首疏諫廷臣乃相繼爭期
得毋易巡視銀庫上祛弊十事中貴不便格不行巡按
浙江織造中官劉成死命歸其事於有司別遣中官呂
貴錄成遺貲貴嗾奸民紀光詭稱機戶詣闕保留貴代
成督造邦華極論二人交關作奸罪光疏不由通政不
下內閣以中旨行之邦華三疏爭皆不報是時神宗好
貨中官有所進奉名為孝順疏中刺及之並劾左右大
奄之黨貴者於是期滿久不得代四十四年引疾歸時

羣小力排東林指鄒元標為黨魁邦華與元標同里相師友又性好別黑白或勸其委蛇邦華曰寧為偏枯之學問不作反覆之小人聞者益嫉之明年以年例出為山東叅議其父廷諫時為南京刑部郎中亦罷歸邦華乃辭疾不赴天啟元年起故官飭易州兵備明年遷光祿少卿即還家省父四月擢右僉都御史代畢自嚴巡撫天津軍府新立庶務草創邦華至極力振飭津門軍遂為諸鎮冠進兵部右侍郎復還家省父四年夏抵京奄黨大譁謂樞輔孫承宗以萬壽節入覲將清君側之惡邦華實召之乃立勒承宗還鎮邦華引疾去明年秋奄黨劾削其官崇禎元年四月起工部右侍郎總督河

道尋改兵部協理戎政還朝召見旋知武會試事竣入營故事冬至郊列隊扈蹕用軍八萬五千人至是增至十萬有奇時方郊總督勲臣缺邦華兼攝其事所設雲輦龍旌寶纛金鼓旗幟甲冑劍戟煥然一新帝悅明年春幸學亦如之命加兵部尚書時戎政大壞邦華先陳更操法慎揀選改戰車精火藥專器械責典守節金錢酌兌馬練大礮九事京營故有占役虛冒之弊占役者其人為諸將所役一小營至四五百人且有賣閒包操諸弊虛冒者無其人諸將及勲戚奄寺豪強以蒼頭冒選鋒壯丁月支厚餉邦華核還占役萬清冒千三大營軍十餘萬半老弱故事軍缺聽告補率由賄得邦華必

親校非年壯力强者不錄自是軍鮮冒濫三營選鋒萬壯丁七千餉倍他軍而疲弱不異邦華下令每把總兵五百月自簡五人年必二十五以下力必二百五十斤以上技必兼弓矢火礮月一解送補選鋒壯丁之缺自是人人思奮三大營領六副將及分三十六營官以三百六十七人計所用掾吏皆積猾邦華按罪十餘人又行一歲二考察之令自是諸奸為戢營馬額二萬六千至是止萬五千他官公事得借騎總督協理及巡視科道例有坐班馬不肖且折錢入橐營馬大耗邦華首減已班馬三之一他官借馬非公事不得騎自是濫借為希京營歲領太僕銀萬六千兩屯田籽粒銀千六十兩兩

犒軍製器胥徒工食取給馬各官取之無度歲用不敷邦華建議先協理歲取千四百總督巡視遞節減自是營帑遂裕營將三百六十聽用者稱是一官缺請託紛至邦華悉杜絕行計日省成法每小營各置簿月上事壯於協理以定殿最舊制三大營外復設三備兵營營三千人餉視正軍而不習技擊益為豪家隱冒邦華核去四千餘人又汰老弱千疏請歸併三大營不另設由是戎政大釐倉場總督南居益言京營歲支米百六十六萬四千餘石視萬歷四十六年增五萬七千餘石宜減省邦華因上議軍以十二萬為額餉以百四十四萬為額歲省二十二萬有奇帝亦報可著為令帝知邦華

忠奏無不從邦華亦感帝知不顧後患諸失利者銜刺骨而怨謗紛然矣其年十月畿輔被兵簡精卒三千守通州二千援薊州自督諸軍營城外軍容甚壯俄有命邦華軍撤還守陴於是偵者不敢遠出聲息遂斷則請防寇賊緝間諜散奸宄禁偽言邦華自聞警衣不解帶捐貲造礮車及諸火器又以外城單薄自請出守而諸不逞之徒乃構蜚語入大內襄城伯李守綺督京營亦銜邦華扼已乘間詆譏邦華自危上疏陳情歸命於帝會滿桂兵拒

大清兵德勝門外城上發大礮助桂悞傷桂兵多都察院都事張道澤遂劾邦華言官交章論列遂罷邦華閒任自是代者以為戒率因循姑息戎政不可問矣邦華前後罷免家居二十年父廷諫無恙十二年四月起南京兵部尚書定營制汰不急之將併分設之營謂守江南不若守江北防下流不若防上流乃由浦口歷滁全椒和相形勢繪圖以獻於浦口置沿江敵臺於滁設戍卒於池河建城垣於滁椒咽喉則築堡於藕塘和遭屠戮請以隸之太平又請開府采石之山置哨太平之港大墾當塗閒田數萬頃資軍儲徐州南北要害水陸交會請宿重兵設總督片檄徵調奠陵京萬全之勢皆下所司未及行以父憂去十五年冬起故官掌南京都察院事俄代劉宗周為左都御史都城被兵即日請督東

南援兵入衛力疾上道明年三月抵九江左良玉潰兵數十萬聲言餉乏欲寄帑於南京艤艫蔽江東下留都士民一夕數徙文武大吏相顧愕眙邦華歎曰中原安靜土東南一角耳身為大臣忍坐視決裂袖手局外而去乎乃停舟草檄告良玉責以大義良玉氣沮答書語頗恭邦華用便宜發九江庫銀十五萬餉之而身入其軍開誠慰勞良玉及其下皆感激誓殺賊報國一軍遂安帝聞之大喜陸見嘉勞邦華跪奏移時數詔起立溫語如家人中官屏息遠伏其後召對百官帝輒目注邦華云舊例御史出巡回道考覈邦華謂回道而後黜害政已多論罷巡按巡鹽御史各一人奉命考試御史黜

冒濫者一人追黜御史無顯過而先任推官著貪聲者一人臺中始畏法十七年二月李自成陷山西邦華密疏請帝固守京師倣永樂朝故事太子監國南都居數月未得命又請定永二王分封太平寧國二府拱護兩京帝得疏意動繞殿行且讀且歎將行其言會帝召對羣臣中允李明睿疏言南遷便給事中光時亨以倡言洩密糾之帝曰國君死社稷正也朕志定矣遂罷邦華策不議未幾賊逼都城亟詣內閣言事魏藻德漫應曰姑待之邦華太息而出已率諸御史登城羣奄拒之不得上十八日外城陷走宿文信國公祠明日內城亦陷乃三揖信國曰邦華死國難請從先生於九原矣為詩

曰堂堂丈夫兮聖賢為徒忠孝大節兮誓死靡渝臨危授命兮吾無愧吾遂投繯而絕贈太保吏部尚書諡忠文 本朝賜諡忠肅 明史

龍之虬字伯子永新人崇禎貢士累官太僕寺少卿巡撫廣西駐柳州比至募兵徵餉無有應者得殘卒二千人審視要害濬濠築壘為戰守具城既被圍之虬率士卒冒矢石晝夜捍禦四閱月先是桂林梧州皆破外援絕守將陳金舉開門為內應城遂陷之虬被執不降死方柳城之未陷也或勸之去之虬曰以死守城吾分也引佩刀示志賦絕命詩藏衣帶間詩曰背君失節敝體辱親不忠不孝賊子亂臣我懷往哲信國忠勤危疆盡瘁

豈敢愛身斷頭剖腹庶幾古人至是果死於難夫人朱氏偕同官婦匿深谷聞變歎曰吾夫得死所矣奮身墜崖而死柳人哀之收其夫婦遺骸葬於鵲耳山 通志本廣西名

官志

劉同升字晉卿吉水人師同里鄒元標崇禎十年殿試第一莊烈帝問年幾何對曰五十有一帝曰若尚如少年勉之授翰林修撰楊嗣昌奪情入閣何楷林蘭友黃道周言之俱獲罪同升抗疏言日者策試諸臣簡用嗣昌良以中外交訐冀得一效拯我蒼生聖明用心亦甚苦矣都人藉藉謂嗣昌縲絏在身且入閣非金革比臣以嗣昌必且哀痛惻怛上告君父辭免綸靡乃循例再疏

遽入辦事夫人有所不忍而後能及其所忍有所不為而後可以有為臣以嗣昌所忍覘其所為知嗣昌心失智短必不能為國建功何也成天下之事在乎志勝天下之任在乎氣志敗氣餒而能任天下事必無是理伎倆已窮苟且富貴兼樞部以重綸扉之權借綸扉為解樞部之漸和議自專票擬由已與方一藻高起潛輩扶同罔功掩敗為勝歲糜金繒養患邊圉立心如此獨不畏堯舜在上乎曩自陛下切責議和而嗣昌不可以為臣今一旦忽易墨纒而嗣昌不可以為子若附和黨比緘口全軀嗣昌得罪名教臣亦得罪名教矣疏入帝大怒謫福建按察司知事移疾歸廷臣屢薦將召用而京

師陷福王立召起故官不赴明年五月南都不守江西郡縣多失同升攜家將入福建止雩都與楊廷麟謀興復唐藩加同升祭酒同升乃入贛州偕廷麟籌兵食取吉安臨江加詹事兼兵部左侍郎同升已羸疾日與士大夫講忠孝大節聞者咸奮以廷麟請撫南贛十二月卒於贛州

明史

郭維經字六修龍泉人天啟五年進士授行人崇禎三年遷南京御史疏陳時弊中有所舉刺帝責令指實乃極稱順天府劉宗周之賢力詆吏部尚書王永光谿刻及用人顛倒罪帝置不問六年秋溫體仁代周延儒輔政維經言政不患無才患有才而用之排正人不用之籌

國事國事日非則委曰我不知坐視盜賊日猖邊警日急止與二三小臣爭口舌角是非平章之地幾成聚訟可謂有才邪帝切責之憂去久之起故官北都變聞南都諸臣有議立潞王者維經力主福王王立進應天府丞仍兼御史巡視中城俄上言聖明御極將二旬一切雪耻除克收拾人心之事絲毫未舉今偽官從橫於鳳泗悍卒搶攘於瓜儀焚戮剽掠之慘漸逼江西而廊廟之上不聞動色相戒惟以漫不切要之務盈庭而議乞令内外文武諸臣洗滌肺腸盡去刻薄偏私及恩怨報復故習一以辦賊復仇為事報聞尋遷大理少卿左僉都御史命專督五城御史察非常清輦轂明年二月隆

平侯張拱日保國公朱國弼相繼以他事劾罷維經維經回籍唐藩召為吏部右侍郎 順治三年五月

大兵圍贛州藩乃令維經為吏部尚書兼右副都御史總理湖廣江西廣東浙江福建軍務督師往援維經與御史姚奇允募兵八千人入贛州與楊廷麟萬元吉協守及城破維經入嵯峨寺自焚死 明史

按同升維經皆於唐藩授侍郎是時我大清定鼎已數年其抗拒

朝命忠於所事者仍收入明史不沒其忠贛州一役死事諸臣皆立本傳仰見

聖朝惇大寬洪褒忠闡幽至優極渥至李邦華殉崇禎之

言安原志 卷四十一
難龍之虬死封疆之任益徵吉安多志士仁人足光
典冊云

國朝

李元鼎字梅公吉水人明天啟壬戌進士授行人遷吏部
稽勲主事調文選歷陞光祿少卿甲申京師陷族叔邦
華殉難死元鼎守柩旁不忍去賊逼不降順治二年授
太僕卿遷太常凡郊廟祭祀諸大典元鼎裁定者居多
歷官兵部左侍郎既而優游林下以詩文自娛十餘年
卒著有石園集灌硯齋文集以子振裕貴加贈戶部尚
書通志

按吉水志傳云都城故有吉安會館為紳士朝覲計
偕宴息之所魏璫假子某欲橫踞之一日持廠票稱
獍至館見者辟易鼎獨挺身抗論繫其一人欲廷論
之衆始去是時璫燄方熾人皆為之危勿顧也方能
廷弼以經畧下獄嫉者騰口交訐人莫能近獨鼎憫
死非其罪經紀其喪入國朝授太僕少卿伏闕上
請卹典以慰忠魂疏上贈邦華吏部尚書諡忠肅會
館故祀文信國鼎奉忠肅木主配焉易會館為二忠
祠此數事當存以紀實

李振裕字維饒元鼎子康熙庚戌進士選庶吉士歷官工
刑戶禮四部尚書振裕生世家好學篤行自入史館至
宗伯常以儒術備顧問與陳廷敬張玉書韓荻等同見

褒嘉督學江南訓諸生本關洛之學選拔貢生皆知名
歲科試藝有彙征錄羣雅集疏請釐正學宮從祀位次
戊子大比滇省以人才日盛請廣額特破例題奏著為
令為大司空督建

太和殿工成費省為大司寇明允庶獄

聖

祖御書咸中有慶樹滋堂匾額以賜已巳歲察賑畿輔災
荒西連井陘北接醫無閭全活甚衆江西苦脚耗督撫
屢疏請免格部議不行振裕為昌言於朝乃得蠲豁至
今全省賴之以原官致仕卒年六十有八有白石山房
集行世子景遂已卯舉人候補知府景迪癸未進士原
官御史景迪乙酉副榜景迴戊子舉人官評事長孫暄

壬午舉人 通志

按吉水志云振裕任戶部時有豪強附勢欲專山陝
北直諸路鐵利振裕力持之商人某告京中鹽引不
敷自願增引振裕以奸商累民亦持不可振裕幼承
父業兼母朱氏能文以故博通百家尤喜收攬賢才
門下如方苞等皆一時儒宿苞未遇時負性抗直嘗
詣振裕門門者辭之遂直前大呼振裕親出慰焉斥
門者去接苞益厚朝中推鉅人長者必以振裕為首

Faint vertical text columns, likely bleed-through from the reverse side of the page. The text is illegible due to fading and ghosting.

